

**Mamarajabova Mohira Rustam qizi**

**Jalilova Mohira Muzaffarovna**

Denov tadbirkorlik va pedagogika instituti talabalari

**Annotatsiya:** Ushbu maqolada inson hayotining eng oliy maqsadi – baxtiyorlik haqida fikr yuritiladi. Muallif baxt tushunchasining mazmun-mohiyatini ochib beradi, uning moddiy emas, balki ruhiy, ma'naviy jihatlariga e'tibor qaratadi. Baxtga erishish yo'llari sifatida halollik, mehnatsevarlik, sabr-toqat, ilm olish va mehr-oqibat kabi fazilatlar ko'rsatib o'tiladi. Maqolada baxtni tashqaridan emas, insonning ichki dunyosidan izlash lozimligi ta'kidlanadi. Umuman olganda, maqola o'quvchini hayotda chinakam baxtning mohiyatini anglashga va unga intilishga undaydi.

**Kalit so'zlar:** baxt, baxtiyorlik, umr maqsadi, ruhiy osoyishtalik, halollik, mehnat, sabr-toqat, ma'naviyat, hayot mazmuni, ichki dunyo

Insoniyat qadimdan baxt izlab yashagan. Har bir insonning qalbida baxtli hayot kechirish orzusi bo'ladi. U yashaydi, mehnat qiladi, orzu qiladi – bularning barchasi uni baxtga eltadigan yo'l sifatida qaraladi. Lekin baxt nima o'zi? Qanday insonni baxtli deyish mumkin? Ushbu maqolada biz aynan shu savollarga javob izlaymiz. Chunki baxtiyorlik – har bir inson uchun eng yuksak, eng muqaddas maqsaddir. Baxt – bu har kim uchun har xil tushuniladi. Kimdir uchun baxt boylikda, boshqalar uchun esa sog'lik, oila, farzandlar kamoli yoki tinch hayotda mujassam. Lekin haqiqiy baxt – bu nafaqat moddiy farovonlik, balki insonning qalbida hukm suruvchi osoyishtalik, ko'ngil hotirjamligi va ma'naviy yuksaklikdir. Chinakam baxtga erishish uchun inson avvalo o'zini anglab yetmog'i, hayotga bo'lgan munosabatini to'g'rilab olishi lozim. Ko'plab mutafakkirlar ta'kidlaganidek, baxt bu – mehnat mahsulidir. Inson halol mehnat qilib, jamiyatga foyda keltirsa, o'zining hayotidan mamnun bo'lishi mumkin. Baxtli yashash uchun inson doimo harakatda, intilishda bo'lishi kerak. Dangasalik, beparvolik, boshqalarga zarar yetkazish – bu kabi illatlar hech qachon baxtga olib bormaydi.

Bundan tashqari, baxtni boshqalarning baxtida ko'ra bilish ham yuksak fazilat sanaladi. Yaqinlarning baxtli bo'lsa, jamiyatda tinchlik hukm sursa, inson o'zini baxtiyor his qiladi. O'zgalarga yaxshilik qilish, mehr berish, kamtarona yashash orqali inson o'z hayotiga mazmun baxsh etadi. Ana shundagina baxt inson qalbida

mustahkam o‘rtnashadi. Afsuski, ba’zi odamlar baxtni kelajakda deb o‘ylab, bugungi kundan rohatlanmaydi. Ammo asl baxt hozirgi kundan boshlanadi. Ertalab quyosh chiqishini ko‘rish, ota-onaning duosini olish, sog‘-salomat yurish, mehrlil so‘z eshitish – bularning barchasi oddiy, ammo chinakam baxt lahzalaridir.

Shuni unutmashlik kerakki, baxtga erishish — bu bir kunlik ish emas. Inson o‘z hayoti davomida turli sinovlarga duch keladi, quvonch va qayg‘uni boshidan o‘tkazadi. Aynan shu sinovlar orqali odam o‘zining chinakam baxtini qadrlashni o‘rganadi. Baxtni boshqalarning hayotiga qarab emas, balki o‘z qadriyatlari asosida aniqlash lozim. Chunki har bir insonning baxti — o‘ziga xos va betakrordir. Zamonamizda baxtni faqat moddiy boylik bilan o‘lchash holatlari ko‘p uchraydi. Ammo yuragida muhabbat, sabr, shukr va rahm-shafqat bo‘lmagan insonlar hatto eng katta boyliklar ichida ham baxtni topolmasligi mumkin. Zero, pul bilan xotirjamlikni, mehri va quvonchni sotib olib bo‘lmaydi.

Baxtiyorlik — bu muvozanatni topa bilishdir. Ruhiy va jismoniy holatning uyg‘unligi, maqsad sari harakat qilish, ijobiy fikrlash va shukronalik keltiradigan oddiy lahzalarni qadrlay olish – bularning barchasi insonni baxtga olib boradi. Har kuni ertalab minnatdorlik bilan uyg‘onish, o‘z oldiga kichik maqsadlar qo‘yib, ularni bosqichma-bosqich amalga oshirish — bu ham baxtli yashash san’atidir.

Yana bir muhim jihat — inson o‘z baxti uchun o‘zi javobgar. Boshqalarni ayblash, taqdiri qoralash, sharoitdan nolish — bu yo‘llar hech qachon baxtga eltmaydi. Aksincha, inson o‘z ustida ishlashi, kamchiliklarini tan olib, ularni bartaraf etishga harakat qilishi kerak. O‘zini rivojlantirgan, ijobiy o‘ylashga odatlangan, har bir vaziyatdan saboq ola biladigan insonlar hayotda ko‘proq baxtiyor bo‘ladi.

Xulosa qilib aytganda, baxtni uzoqdan izlash shart emas — u har bir insonning yuragida, o‘ziga va hayotga bo‘lgan munosabatida yashaydi. Baxtli hayot — bu halol mehnat, sog‘lom tafakkur, mehrlil munosabat va shukronalik bilan boyitilgan kundalik yashash tarzidir. Har kim o‘zining baxtini topishi uchun avvalo o‘zini anglamog‘i, o‘z ustida ishlamog‘i lozim. Inson chin dildan istasa, har qanday sharoitda ham baxtli bo‘lish yo‘lini topa oladi. Chunki baxt — tayyor holda beriladigan ne’mat emas, balki mehnat, sabr va ma’naviy yetuklik orqali qo‘lga kiritiladigan bebaho boylikdir.

### **Foydanilgan adabiyotlar ro‘yxati:**

1. Tarbiya 5-sinf o‘quvchilari uchun darslik. M. Quronov, Yu. Risyukova, O.Tigay, O.Usmanova, S.Xafizova. “G‘afur G‘ulom”, Toshkent-2020.
2. Tarbiya 6-sinf o‘quvchilari uchun darslik. M. Quronov Yu. Risyukova, O.Tigay, O.Usmonova, S. Xafizova. “G‘afur G‘ulom”, Toshkent-2020.
3. Tarbiya 7-sinf o‘quvchilari uchun darslik. D. Kenjayev, N. Ismatova, D.Ro‘ziyeva, N.Xolmuxamedova, Sh.Sattorov, Z.Zamonov, Z.Islomov, O.Mahmudov,

D.Rahimjonov, S.Akkulova, S.Shermammedova, S.Madaliyeva, S.Zokirova, L.Mo‘minova. “O‘zbekiston”, Toshkent-2020.

4. Tarbiya 8-sinf o‘quvchilari uchun darslik. Z. Zamonov, O. Maxmudov, Z.Islomov, D Ro‘ziyeva, D.Rahimjonov, Sh. Sattorov, N.Ismatova, S.Akkulova, S.Shermuxamedova, N.Xolmuxamedova, S.Madaliyeva, L.Mo‘minova, S.Zokirov. “Zamin nashr”, Toshkent-2020.